

علوم اقتصادیه و اجتماعیه

مجموعه علم

هر آیت برنجی کونی نصر اولنور

مؤسسی :
احمد شعیب ، رضا نوقیو ، محمد هاروب

مسترجات :

روسیه : احمد شعیب . — بودجه . — بکر منجی مصرده
مسئله اقتصادیه : حسن تحسین . — استقراضات . —
فرانسه اختلال کبیری : احمد شعیب .

مدیر و صاحب امتیازی :

محمد هاروب

امور اداره و تحریریه : نور عثمانیه جوارنده طنین اداره خانه سی

نسخه سی : ۱۰ غروش

استانبول

باب عالی جاده سنده هلال مطبعه سی ، نومرو ۶۶

علوم اقتصادیه و اجتماعیه مجموعہ

روسیہ

تبعات محیطہ و مشربہ

۱

بوکون یکی آوروپا ، اعضاسی یکدیگر بنہ مربوط بوبوک برعائله در .
پارس مہادہ سندن ، دہا دوعروسی ۱۰ تموز یوم مہجندنبری ایچنہ
کیردیکمز بوعائله افرادی بحق طانیالی یز . ہلہ عصرلردنبری آرامزدہ
انفعال آلود ماجرالر کچن قومشومن روسیہ ایمپراطورلقندہ بر جولان
تبع بائق فرائض وطنپرورانہ جملہ سندنر . ہم بوتبع ، بزم ایچین بر
منبع پر فیضان کمال ومعلومات تشکیل ایدر . آرتق ادعای تمدن ایدن
اقوامہ خرافات تاریخیہ ایلہ فریقہ خیال اولق یاقیشماز ... روسیہ نک
مدنیتی اوزرنندہ یاشادینی طوپراق ، چیقدینی قان ایلہ ، تاریخنک کندینہ
ویردیکی تربیہ نک بر نتیجہ سی در . روسیانک حال حاضری ماضیسندن
دوغمشدر . بر قومی آکلامق ایچین تحت تأثیرندہ بولوندینی مؤثرات مادہ
ومعنویہ سنی اوکریمہ لیدر . بناء علیہ روسیہ یی بیلک اقلیتی ، تاریخی ،
مذهبنی بیلکہ متوققدر .

روسیہ آوروپا قطعہ سنک قسم اعظام شرقیسندن عبارت کنیش بر

مملکت در . شمالاً بحر منجمد شمالی و بوکا مربوط شمالی آق دیکزله ؛ شرقاً اورال سلسلهٔ جبالی ، اورال نهری و بحر حزرله ؛ جنوباً قفقاس سلسلهٔ جبالی و قارا دیکزله ؛ غرباً رومانی ، آستریا و پروسیا ایله ، صوکره بالطیق دیکزی و بونک کورفرلریله اسوچ و نوروچله محاط و محدود در . بو قطعه نك حدودی داخلنده اصلی روسیه دن باشقه لهستان ، فنلاندیا و ترانسقافقاسیه ده بولونیور . $3^{\circ} 22' 40''$ ایله $69^{\circ} 56'$ عرض شمالی و $31^{\circ} 17' 15''$ ایله $83^{\circ} 48' 31''$ طول شرقی آرالنده ممتد اولوب شمال شرقیدن جنوب غربی یه دوغرو اولان طول اعظمی $40^{\circ} 33'$ شرقدن غربی اولان عرض اعظمی ده 2700 کیلو مترودر . اراضیسنک شکل طبیعیسنجه روسیه قطعه سی غربی آوروپادن بوس بوتون فرقی اولوب آوروپای غربینک اراضیسنه نسبتاً سواحلی چوق و کورفرلر ، برونلر ، شبه جزیره لرله مزین اولدینی حالده روسیه نك وسعت اراضیسنه نسبتاً سواحلی پك آز و بناء علیه اکثر طرفری دیکزدن پك اوزاقدیر . علم الارضه تعلق ایدن احوالی ده آوروپای غربیدن باشقه در . آوروپانك سائر طرفلرنده طبقات مختلفه اراضیسنك عوارضیه آلت اوست اوله رق پك مختلف وضعیتلرده بولوندینی حالده روسیه ده طبقات مذکورده همان هر برده منتظم برصورتده موضوعدر . بو کیفیت روسیه نك پك آز صدماته اوغرامش اولمسندن ایلری کلیور . آوروپانك سائر طرفلرنده سطح اراضی طاغیر ، اوولر ، دره لر ، تپه لر بربرینی ولی و تعاقب ایده جك صورتده مختلف الشکل اولوب بو اوچ حال آوروپانك سائر قطعات ارضه رجحاتی موجب اولدینی حالده روسیه ده بو اوچنجهی حالده بوس بوتون منعکس اولوب ، او واسع مملکت بریاندن بریانه آز متوج بویوک بر اووه صورتده در . آسیا حدودینی تشکیل ایدن و بناء علیه کنارلرنده بولونان

قفقاس و اورال سلسله‌لریله آوستریاده‌کی قارپات سلسله‌سندن و نوروج
 طاغلرندن تشعب ایدن برطاقم آلچاق قوللر و کوچوک تپه‌لر مستثنی اولدینی
 حالدہ ، روسیہ‌نک داخلندہ بحق طاغ دنیلہ‌جک ارتفاعلر مفقوددر .
 مملکتک اورتالرنده بحر حرزله قارا دکنز ، بحر منجمد شمالی ایله بالطیق
 دکنزی مائله‌لری تفریق ایدن وپک چوق انهارک منابغی جامع اولان
 یرلر بعض خریطه‌لرده سلاسل جبال صورتندہ ترسیم ایدلدیکی حالدہ
 حذای بچردن ۴۰۰ مترودن اشاغی ارتفاعی اولان برطاقم تپه‌لردن و بعض
 یرلرده ارتفاعی انجق حس اولونا بیله‌جک آلچق صرتلردن عبارتدر .
 روسیانک بحق طاغ دنیلہ‌جک اولان اورال و قافقاس سلسله‌لرینه
 کلنجہ : اورال بحر منجمد شمالی‌یه مربوط « قاره » دکنزی ساحلک قریندن
 باشلایه‌رق ، وابتدا غربه بعده شرقه دوغرو آجیق ایکی قوس تشکیل
 ایده‌رک ، شمالدن جنوبه دوغرو اوزانیر ، و بحر حرزلی احاطه ایدن
 اراضی منخطیه قدر واصل اولوب ، اوراده غرب جنوبی‌یه دوغرو بر
 قول ویرر . ۱۵۵۰ مترو طولی اولان بوسلسله عظیمه‌نک وسعتی بویله متناسب
 اولوب ، شمال جهتده بر ، قسم وسطی‌سندہ ایکی ، قسم جنوبی‌سندہ اوج صرت
 اوله‌رق متوازی‌ایتمد اولور ؛ صاغ و صوله‌پک آز وپک قیصه قوللر صالار .
 اُک مرتفع ذروه‌سی قسم شمالی‌سندہ واقع « تولیوس ایسی » طاغی اولوب
 ۱۶۹۰ مترو ارتفاعی واردر . سائر جهتلردن اکثرینک ارتفاعی بومقدار
 ایله ۱۵۰۰ مترو آراسنده در .

قافقاس سلسله‌سی ایسه قارا دکنزله بحر خزر آراسنده ۱۲۰۰ کیلو
 متره‌ک مسافده غرب شمالیدن شرق جنوبی‌یه دوغرو ایکی و بعض یرلرده
 اوج صرت اوزره متمد اولوب ، اُک یوکسک محلی اولان « البرز » طاغک
 ذروه‌سی ۵۶۳۰ متره ارتفاعنده در . یوکسک یرلری سرمدی قارلر

و بوزلرله مستور اولان بوسلسله نك يالكز شمال ائتكلری و « مانچ »
مجراسنه دوغرو اوزانان بعض كوچوك قوللری روسیه دن معدود اولوب ،
سلسله مذکور نك بويوك قول و شعبه لری ایسه آسیا قطعه سنده ایران
و ممالك عثمانیه داخلنده ممد اولور . بوسلسله اصل روسیه نك و آوروپا
قطعه نك او جهتدن حدودینی آرر بر دیوار حکمنده در .

روسیه نك داخلنی تشکیل ایدن او واسع اووه نك بعض یزلی زیاده
منخط اولوب كوللر و بطاقلقلری حاوی بولونیور . بو منخط جهتلرینك
بری واک واسی فینلانده ایله اوکا قریب محللرده یعنی پترسبورغك شمال
شرقی جهتده واقع اولوب ، برچوق بويوك و كوچوك كوللری حاویدر .
ایکنجیسی آوستریا حدودی قریبده « وولینیه » خطه سنده بر چوق
بطاقلقلری شاملدر . اوچنجیسی ده بحر خزر سواحلی قریبده اولان
وحدای بچردن آشاغی بولونان انحطاط معلومدر .

روسیه نك طاغلری نه قدر آز ایسه نهرلری او قدر چوقدر ، پك
بويوك ایرماقلری و بونلره دوکیلور حسابسز چاپلری اولمقله بونلرک
مجرالری عادتاً بر آغ تشکیل ایدیور . انهارینك پك آزی اورال
سلسله سندن و حدودده بولنان سائر طاغلردن کلوب ، چوغی مملکتینك
اورتالرنده کی آلچق صرتلردن و تپه لردن نبعان ایدر . تقسیم میاه خطی
پك قاریشق اولوب ، مثلاً شمال غربی سواحلتیه قریب محللرده نبعان
ایدن بر چوق نهرلر بحر خزره ویا قره دکیزه دوکولدیکی حالده ، دها
جنوبی محللردن نبعان ایدن دیگرلری بالطق دکیزیه ویا بحر منجمد
شمالییه منصب اولور . درت دکیزله محاط اولمقله بالطبع درت مائله یه
منقسمدر . اک واسی بحر خزر ، ایکنجی درجه ده قارا دکیز ، اوچنجی
درجه ده بحر منجمد شمالی ، دردیجی درجه ده بالطق دکیزی مائله سیدر .

روسیه نك وبوتون اوروپا قطعہ سنك اك بويوك نہری « وولخہ »
 ایرماغیدرکہ مجراسنك طولی ۳۷۱۳ کیلو مترہ ، حوضہ سنك وسعی
 ۱۴۵۸۹۳۲ مربع کیلو مترہ ، وحد وسطی اولہرق نانیدہ دوکدیکی
 صویك مقداری دہ ۹۸۹۹ مکعب مترہ در . بو جسم ایرماق روسیہ نك
 شمال غربی جہتدہ « تور » ایلہ « نوو غورود » ایالتلری آراسندہ ایجق
 ۲۴۹ مترو ارتفاعی اولان والدای صرتندہ واقع بر قاچ کولدن نبعانلہ ،
 جنوب شرقیہ ، صوکرہ شمال شرقیہ ، بعدہ ینہ جنوب شرقیہ و شرقہ
 دوغرو آقہرق وصاغدن صولدن بر چوق انہارک صولرینی آلہرق
 « قزان » شہرینہ واصل اولونجہ دفعہ جنوبہ دوغرو دوزر ؛ کاه غربہ
 کاه شرقہ میلانلہ جنوبہ دوغرو آقوب اذدرہان اووہ سندہ بر چوق
 قولارہ آیریلیر ، و شہر مذکورک آلتندہ بر بویوك دالیہ و بر چوق
 جزایر تشکیل ایدر . بحر خزرہ منصب اولمق اوزرہ ، روسیانك دیگر
 ایکی نہری دہا واردر . لکن بونلر اوروپادن زیادہ آسیا قطعہ سنہ
 منسوبدرلر . بری اورال سلسلہ سنك شرق جنوبی اُنکُلرندن نبعانلہ ،
 آلق بر اووہ نك ایچندہ جنوبہ دوغرو جریان ایدہرك ، بحر مذکورک
 ساحل شمالیسنہ واصل اولان « اورال » نہریدر . ایکنجیسی قافقاس طاغلرینك
 شمالی اُنکُلرندن اینوب ، شرق شمالیہ دوغرو جریانلہ بر دالیہ تشکیل
 ایدن « ترك » نہریدر . داغستاندہ « صولاق » « سمور » اسملریلہ ایکی
 نہر بحر خزرہ منصب اولورلر .

روسیہ نك وولخہ دن صوکرہ ایکنجی درجہ دہ نہری قارا دکیزہ
 دوکیلن « دینبر » نہریدرکہ مجراسی ۲۱۴۶ کیلو مترہ طولندہ و حوضہ سی
 روسیہ داخلندہ ۵۲۳ ۶۷۶ و آوستریادہ کی قسیملہ برابر ۵۲۶ ۹۵۶ مربع
 کیلو مترہ وسعتندہ در . حد وسطی اوزرہ نانیدہ ۲۸۰۰ مکعب مترہ

صو دوکر . بونهر « اسمولنسک » ایالتده واقع بر کوچوک کولدن تبعانله ابتدا غرب جنوبییه و بعده جنوبه دوغرو آقارق و صاغ و سولدن بر چوق انهار آلهرق جنوب شرقیه دوزر ؛ « بقازینوسلاو » شهرینه واصل اولونجه جنوبه و صوکره جنوب غربییه دوغرو آقارق « خرسون » شهرنی بعدالاروا هوجه بکک قارشینسده واقع طار و اوزون بر خلیجک ایچنه دوکیلور ؛ و بو خلیجده « بوغ » نهریله برلشیر . دینپردن صوکره قارا دکیزه تابع روس نهرلرینک اک بویوکی آزاق دکیزینه دوکیلن « دون » نهریدر . مجراسی ۱۸۵۵ کیلو مترو و حوضه سی ده ۴۳۳۶۰ مربع کیلو مترو وسعتده در . « توله » ایالتده تبعانله ، جنوب شرقییه ، بعده جنوبه و صوکره شرقه دوغرو آقارق و سولدن بر طاقم چاپلر آلهرق نتیجه ده « آزاق » دکیزینک منهای شمال شرقی گوشه سنی تشکیل ایدن کورفرزه دوکیلور . دوغریدن دوغری به قارا دکیزه دوکیلن روسیه انهارینک بری ده « دینستر » در .

بحر منجمد شمالییه دوکیلن روسیه انهارینک اک بویوکی « پجوره » اولوب بوتون روسیه نهرلرینک وولفه و دینپردن صوکره اوچنجیسیدر . بونهر عظیم اورال سلسله جبالی قسم شمالینسک غربی اتکلرندن اینن صولری جمع ایله ابتدا شماله دوغرو آقار و تابعلرینک اک بویوکی اولان « اوسانی » آلدقندن صوکره ابتدا غربه بعده شماله دوغرو دوزر ؛ و بر چوق کوچوک و خالی جزایری حاوی اولان همنامی طار و اوزون بر خلیجه دوکیلور . مجراسی ۱۵۸۲ کیلو مترو طولسده و حوضه سی ۳۲۹۵۰۳ مربع کیلو مترو وسعتده در . بونک شرق طرفنده آوروپا ایله آسیا آراسنده خط حدودی تشکیل ایدن « قاره » نهری بولونوب همنامی اولان کورفرزه آقار . پجوره منصبک غرب جهته ده « مرن »

و «قولوی» نهرلری بحر منجمد شمالینک «شمالی آق دکنز» دینلن بویوک کورفزینک مدخلنده واقع «مزن» کورفزینه منصب اولورلر. مذکور آق دکنزک ایچنه ایسه بومالانک ایکنجی نهری اولان «دوبنه» نهری دوکیلورکه روسیه نك تقسیم میاه خطی تشکیل ایدن صرتدن وبر طاقم کوللردن نبعان ایدن بر چوق چایلردن بالتشکل، شماله دوغرو جریانه «آرخانکل» کورفزینه دوکیلور. مجراسنک طولی ۳۷۳ کیلومتره و حوضه سی ایسه ۶۶۴ ۹۰ مربع کیلومتره در...

بالطی دکنزیه و بونک کورفزلرینه دوکیان روسیه انهارینه کلنجه، بونلرک اک بویوک «دونه» یاخود «غربی دونه» ایرماغیدرکه وولغه و دینپرک منسابی قرینده «والدای» صرتدن نبعانه غرب جنوبییه و بعده غرب شمالییه دوغرو آقهرق، ۸۵۴۸۱ مربع کیلومتره لک بر حوضه نك ایچنده ۱۰۲۴ کیلومتره لک جریاندن صوکره «ریفا» کورفزینه دوکیلور. بونک جنوب جهتنده «نین» نهری مجراسنک یالکز آشاغیک ۱۱۴ کیلومتره لک محلی و منصبی پروسیه ده و اوست طرفی روسیه طور اغنده در. لهستانده آقان نهرلرک جمله سی پروسیه ده داخل اولوب، بونلرک اک بویوک اولان «ویستوله» ایرماغنک ایسه منابی و مجراسنک اوست طرفی آوستریاده و آشاغی طرفیه منصبی پروسیه ده اولوب، یالکز قسم وسطیسی یعنی ۴۲۵ کیلومتره لکی لهستانده بولونیور. روسیه نك کوللاری ده بک چوق اولوب مجموع مساحه سطحیه سی ۱۵۲ ۴۵۲ مربع کیلومتره در. ۵۳۰۰ دن زیاده کوللری اولوب بونلردن ۵۴ ینک یوز، ۱۵ نك ۵۰۰، ۸ نيك ۱۰۰۰ مربع کیلومتره دن زیاده مساحه سطحیه لری واردر. بو کوللرک همان جمله سی روسیه نك شمال غربی قسمنده و فیلانده و لایونیه خطه لرنده در. هله فیلانده نك بعض

ایالتلری قارادن زیاده صوبی حاویدرلر . چوغنی بربرینه ربط ایدن نهرلر
 و بوغازلر بولونوب ، بعضلری ده دار بر طاقم برزخلرله آیرلشدرو . روسیه
 کوللرینک ابویوکی پترسبورغک شرق شمالی جهتنده واقع و مساحت سطحیه سی
 ۱۸۱۲۱ مربع کیلو متروند عبارت اولان «لادوغه» کولی اولوب
 استوینه ایله لیوینه خطلرینک شرق جهتنده واقع «پپوس» کولی ده اک
 بویوکلرندند . و ولفه مجراسنک آلت طرفلرنده و بحر خزرله قارا دکز
 آراسنده کی آلچق برلرده بر چوق طوزلی کوچوک کولار واردرو .
 هر نه قدر روسیه حدودینک ثلثانی دکزدن عبارت ایهده ، اراضینک
 وسعت فوق العاده سی هر طرفک دکزدن استفاده ایتسنه مانع اولدقدن
 باشقه ، دکزلرینک اکثری سنه نک قسم اعظمنده منجمد حالنده بولندیقندن ،
 و بعضلری چوللرله و غیر متمدن ممالکله محاط اولدینی کبی ، بعضلرینک ده
 مدخللری دول سائره آلرنده بولندیقندن ، روسیه نک تجارت و کرک
 حرب نقطه نظرجه آجیق والویریشلی هیچ بردکیزی یوق دیمکدر . بحر منجمد
 شمالی ، استندن ده آکلاشیلدینی کبی ، سنه ده یالکز بر قاج آی بوزدن
 قور تولورسهده ، اونه سی قطب شمالی اولدیقندن ، تجارت یولی دکدر .
 بالطبع دکزی و علی الخصوص باشلیجه روسیه سواحلی تشکیل ایدن
 فینلانده و بوتینه کورفلرلی دخی قیشلری کاملاً منجمد حالنده بولندیقی
 کبی بودکیزک مدخلی دانیمارقه ایله اسوچ و نورچ آراسنده اولدیقندن روسیه
 ایچین هر وقت آجیق عدا ایدیه من . قارا دکیز روسیه ایله اناطولی و روم
 ایلی سواحل عثمانیه سی آراسنده خصوصی بر طریق تجارت اولوب ،
 بونکده قاپولری روسیه به مسدوددر . بحر خزره کنبه ، ذاتاً اکثر
 سواحلی بظاقلقدن عبارت چوللر و قامشقلرله محاط برکول حکمنده اولقله
 برابر ، بودکیز دخی روسیه ایله ایران و تورکستان بیننده جزئی بر تجارت

طریق اولمقدن باشقه بر شیه یارامبور . الحاصل ، روسیه اساساً قارادن عبارت اولوب ، دکیزه اولونه جق استفاددن محروم صایلابیلیر .

مع هذا بحر منجمد شمالی ایله بالطبق دکیزی یك کیریتیلی چیققتیلی اولوب درین کورفز و خلیجیلر تشکیل اتمکله برابر ، بو کورفز و خلیجیلرک اوچلرلنده سیر سفائنه صالح بویوک ایرماقلر منصبلری بولونیور . بو حال سنهده سکز اون آی قار و بوز آلتنده بولونان بر اقلیه تضادف اتمیه ایدی ، روسیهینی برنجی درجهده ممالک بحریه صیراسنه قویا بیلیدی . بحر منجمد شمالی سواحلی نوروچ حدودندن باشلایه رق روسیهنک شمالنده « لاپونیه » تعیر اولونان خطهده « قوله » اسمیه غرب شمالیدن شرق جنوبی به متمد جسم بر شبه جزیره ابراز ایدیورکه بونک سواحلنک قسم غریبسی ایکی اوچ یوز متره مرتفع و دیک ایسهده کتدکجه آلجالبوب ، ینه « قوله » اسمیه درین بر خلیجی و برکوله منتهی ایرماغی واردر . مکسیقه کورفزندن کلن معروف « غولف استریم » آقینیسنک صیقاقلنی مناسبته بوساحل نادراً طونار ، و کوزل بعض لیمانلری دنخی حاویدر ... بحر منجمد شمالیده کی روسیه اسکلهلرینک اک مهم وایشلکی شمالی آق دکزک همنامی اولان کورفزنده واقع « آرханگل » اسکله سیدر .

بالطبق دکیزینک سواحلی روسیه سواحلنک اک ایملری اولوب ، روسیه حدودندن باشلایان « قورلانده » خطهسنک ساحللی دوزو آلحق ایسهده شماله دوغرو متمد اولدکجه یوکسه لیر . « دونه » ایرماغنک منصبی حاوی اولان « ریفا » کورفزی تشکیل ایدوب ، بو کورفز « رونو » و « کوهنو » اسملریله ایکی طاقم کوچوک آطلرلی حاویدر ؛ آچیققلرنده « اوسل » اسمیه بویوجک بر جزیره ایله بونک شرقنده « موهن » و شمالنده

« دا کو » ، « وورمن » آٹلری بولونیور . بعدہ ساحل شرقہ دوغرو دونوب ، قارالک ایجنہ پک درین کیرک ، « فینلانڈ » کورفرنی تشکیل ایدرک بوکورفر پک چوق قوی ولیمانری وعلی الخصوص « ناروہ » ایرماغنک منصبی حاوی اولان « ناروہ » قویله پترسبورگک ایچندن کچن « نوا » ایرماغنک منصبدہ واقع « قرونستاد » لیمان واسکلسنی شاملدر . بوکورفرزده حسابسز جزیردلر و آٹہ جقلر بولونوب ، اک مشہوری پترسبورگک مدافعہ سنہ یارایان استحکامات جسمیہ یی حاوی اولان « کوتلین » جزیرہ سیدرہ کورفرک سواحل شمالیہ سی ایسہ فینلانڈ خطہ سنہ منسوب اولوب ، بوخطہ نیک سائر سواحلی کبی قیالقی ودرین خیلجلرلہ اوزون برونلری و قیادن عبارت آٹہ جقلری حاوی اولہرق ، بوقیالک چوغی جسم استحکاماتہ احکام اولونمشدر

قارا دکنز سواحلتہ کلنجہ : بودکیزده کی روس سواحلتک بر قسمی یعنی « کرچ » بوغازندن آناتولی حدودینہ قدر اولانی بلاد قافقاسہ یعنی آسیا قطعہ سنہ منسوبدر . آوروپا قطعہ سنہ وبناء عالیہ اصل روسیہ یہ عائد اولان قسمده ایکی بہ منقسمدر . بری دوغریدن دوغری یہ قارا دکنزده ، دیگریدہ قارا دکنزہ ملحق اولان آزاکی دکنزده بولونانیدر . دکنزلرک ایچندہ آٹہ سز لقلہ مشہور اولان قارا دکنزک طرز مطردینی براز تنوعہ اوغرا دیر بر شی وارسہ ، اودہ شہہ سز قریم شبہ جزیرہ سی در . حد ذاتندہ طبیعتک بر چوق محسنانہ نائل اولان بوشبہ جزیرہ قافقاس سلسلہ جبالک قارا دکنزک ایچندہ غرب شمالی یہ دوغرو اوزاتدینی برونہ مقابل بر دیگر برون اوزاتمقلہ و آرارلندہ طار بر بوغاز تشکیل ایتمکلہ ، قارا دکنزک بر بویوک پارچہ سی آری بر دکنز صورتندہ آریورکہ بودہ « آزاکی » یاخود « آزوف » دکنزی اسمیلہ معروفدر . کرچ بوغازندن

اعتباراً روسیه نك قارا دكز سواحلی تعقیب ایتدیكمز حالده ابتدا قریم
 شیه جزیره سنك سواحله راست کایورز . کرج بوغازندن غربه دوغرو
 ممتد اولان دوز ساحلده ابتدا کفه قویی واسکله سی بولونوب ، بعده
 یایله طاغی ساحله متوازیاً ممتد اولقله ، باغ و باغچه لرله مستور بر صیرا
 کوزل بایرلر ابراز ایدیور . « سیواستوپول » ه قدر اوزانان بوکوزل
 ساحلده شهر مذکور دن باشقه سودان ، یالطه ، بالقوه اسکله لر ی بولونیور
 سیواستوپول دن صوکره ، ساحلی هلال شکنده غرب شمالی یه دوغرو ممتد
 اولوب ، « طرخان قوت » برونه مواصاتی متعاقب شرق شمالی یه وبعده
 غربه دوغرو دونه رك « اولو دکنز » تعمیر اولونان بر کورفز
 تشکیل ایدیور که بونك منتهاسنده واقع « پرقوب » برزخی اخیراً
 حفر اولونقله ، اورادن آزاق دکنزیه اختلاط حاصل اولمش ،
 وقریم بر جزیره حالنده قالمشدر . مذکور کورفزك غرب جهتده آز
 درین لکن کنیش دیگر بر کورفز بولونیور ، که شرقی کنارنده دینپر
 ایرماغنك منصبی و غربی گوشه سنده هوجه بك اسکله سی واردر .
 هوجه بکدن صوکره ساحل جنوب غربی یه دوغرو ممتد اولوب ،
 « دینستر » منصبده آق کرمان اسکله سخی و ده ایلریده دکنزدن قوم
 سدرلیه آیرلش بعض طوزلی کوللری و ملحه لر ی حاویدر . بووجه ایله
 طونه ساحله واصل اولور .

آزاق دکنزی ایسه دکنزدن زیاده طوزلی بر کول دینلکه شایان
 اولوب ، اك درین محلی ۱۲ متره بی تجاوز ایتز . دون ایرماغنك وسائر
 بعض انهارك دوکدکلی صو تخرات واقع دن زیاده اولقله ، کرج
 بوغازنده دائمی صورتده شدلی بر آقیتی بولونیور ؛ و مذکور ایرماغنك
 ایندیردیکی قوملر بو بوغازك درینلکنی ۴ متره یه تنزیل ایتشدر . ینه

بوقوملر آزاق دكيزينك غرب جهتندە « اوق » تعبير اولنور طار و غایت اوزون برطاقم قارالر تشكىل ايتمشدرکه بر ويا ايکي طرفدن قارايه مربوط اوله رق ساحلك اوکنده ممتد اولورلر . دكيزك منتهای غربنده قريم شبه جزيره سيله نفس روسيه آراسنده طار بر خلیج غربه دوغرو خیلی ممتد اولوب ، برقوب اسکله سنه قدر کلبور . بو خلیجك ایچنده بر قاج کوچوک آطه ده واردر . آزاق دكيزنده آلتی قدر اسکله بولونوب ، اک ایشلکری دون ایرماغی منصبندە واقع « روستوف » ایله بونک غرب جهتندە کان « طانقاروق » اسکله لیدر .

بحر خزرک روسیه نك آئنده اولوب آوروپا قطعە سنه عائد اولان سواحلی اورال ایرماغی منصبندن « باکو » برونه قدر ممتد اولوب بحر مذکورک شمال غربی سواحلیله سواحلیله غربیه سنک قسم اعظمندن عبارتدر . بو ساحلك قسم شمالیسی آلتی ، قوملق وسازلق اولوب ، ذکره شایان برحالی وارسه اوده اورال ، وولغه و ترک ایرماغلرینک و علی الخصوص وولغه نك منصبلنده تشکیل ایتدکری دالیه لدرکه دكيزك ایچنه اوزاعش برطاقم آطه لر وشبه جزیره لردن مرکب اولوب ، جامور وقومدن متشکلدرلر . و آرالنده دكيز برطاقم جدولر آچه رق ، کنارلی حذای یخردن اون متره قدر یوکشلیدر . وولغه دالیه سنک جهت جنوبیه سنده ینه قوملق وسازلق اولق اوزره حسابسز کوچوک آطه لر بولونیور . بوسواحله اک اهمیتلی اسکله منتهای جنوبیه بولونان « باکو » اسکله سی اولوب وولغه دالیه سنده کی ازدرهانک نهر مذکور آغلرینک مسدور اولماسندن دولای ، بحرأ استعداد تجاریه سی اولمادیغی کی ، ترک نهرینک دالیه سنده واقع « قیزلر » قصبه سی ده بو حالده در .

روس امپراطور رخنده اك ازل نظر دقتی جلب ایدن شی و سعتی دره .
 یکریمی ایکی میلیون مربع کیلو متره دن زیاده مساحت سطحیسی اولوب ،
 فرانسه دن اونبر ، ایتالیا و انگلتره دن ده اون اتی ویا اون یدی کره
 بویوکدر . کره ارضك اك واسع اووالرینه مالک اولدینی کی آوروپانك
 اك جسم کوللری ده اراده دره . روس اراضیسك اونده دوقوزی هنوز
 سکنه دن محروم ایکن بوکون نفوسی تقریباً یوز اوتوز ملیوندر .

عجباروسییه نك طوبراغی ، اقلیمی اوروپا قطعه سندن عد اولوناییلمی ؟
 روسیه آسیا ایله یکووجود کیدر . آره لرند پك آز مرتفع بر سلسله
 جبال واردر . دیگر طرفدن آوروپانك نه بنیه سنه ونده اقلیمه بکزر
 عینی عرض دائره سی داخلده غربی روسیه نك قیشی قدر شدتلی ،
 یازی قدر یاقچی هیچ بریر یوقدر . اوروپایی تسخین ایدن بحر محیطك
 جریانلرینه ، صحرای کیرك روزکارلرینه قارشى روسیه بیکانه دره . غولف
 استریم ایله آفریقانك چوللری رینه قطبك بوزلری ، آسیانك قسم
 شمالیسی قائمدر . اورال سلسله سی سطحی برسددر . شمال روزکارلرینه
 قارشى بر حائل بولایتلك ایچین قافقاسیه نك آشاغی طرفلرینه اینهلیدر .
 تشکل ارض بوتون جریانات هوائییه کشاده بر طرزده دره .

روسیه یی آوروپادن تفریق ایدن خطوط عظیمه نك بر دیگریده
 طاغلردن محرومیتی دره . روس طوبراغنك افق بر وضعیتده اولماسی
 جغرافیاسنك بر صفت ممیزه سیدر . بنیه ژه اولوژییه ، اقلیمده روسیه یی
 آوروپادن آرر . حوالی جبالانك مفقودیتی ، و دکزلره اوزاقلاندن
 دولایی روسیه طوبراغنك قسم اعظمنده رطوبت یوقدر . اوقیانوسك

روز کارلری بورایه همان سو بخارندن کاملاً محروم بر حالدء کلیر .
 بناءً علیه رطوبت غربدن شرقه دوعرو تناقص ایدء رك آسیای مرکزیه
 حد اصغری یه اینر . قازانده لا اقل پارسدن ایکی کره آز یاغور یاغار .
 روسیه نك او مشهور استپلری (Steppe) قوۋا نباتیه نك الك مهم عناصرندن اولان
 رطوبت و حرارتك فقدانی نتیجه سی در . روسیا غربی آوروپادن بوس بوتون
 باشقه اولوب حدود تماس و تقریبی تشکیل ایدن آسیا ایله دها صبقی
 مناسبده دره شو حالدء روسیه یی طبیعت نامنه آسیایه می قویق ایجاب اید بور ؟
 خبر ! روسیه آسیالی اولمادینی کی آوروپالی ده دکلدر . طوبراغی ، اقلیمی
 حاصلی اوصاف طبیعیه نك هیئات مجموعہ سی اعتبار یله آوروپا قدر آسیادن ده
 فرق لیدر . اورالك ایکی طرفده روسیه یالکز باشنه بر قطعه در .
 حیوانات و نباتات خصوصندء روسیه پك زنکین دکلدر . اقطار
 شمالیده بیاض آبی و شمال تلکیسی ایله سواحلدء آبی بالقی ، دکر
 اوردکی و ایکی نوع ککلیک ایله مورینه و سائر جنسلردن پك چوق بالیق
 بولونور . دها آشاعیده اورمانلر منطقه سنده بوز آبی ، برنوع کیک ،
 تیلکی ، کلنجك ، طاوشان و کلیتی قوردلر واردر . ایکی یوز بیک قدر
 تخمین اولونان قوردلر سنوی تقریباً آلتش میلیون فرانق قیمتده
 حیوانات اهلیه اتلاف ایدرلر . یبانی طوموزلر یالکز « دونه »
 وادیسندء بولونور . بش اون عصر اول روسیه ده سوریلرله کرن
 یبانی آتار مرور زمانله اتلاف و یا تانیس اولونوب ، الیوم بولونمادینی
 کی ، یبانی صغیرلرکده جنساری منقرض اولماق ایچین صیدلری
 ممنوعیت قویه آلتء آلتشدر . قوشلر پك چوق و متنوعدر . نهرلرده
 بالیقلرک انواعی واردر . اوتلی چوللرده ایسه بوملارله مخصوص برنوع
 تیلکی ایله طاوشان ، سنجاب و طاغ صیانی کلیت اوزره بولونوب

اور ماندارہ یاشایان حیوانات وحشیہ نیک دہ بعضا رینہ تصادف اولو نور .
 هوام پک آز ، ییلان هیچ یوقدر .

روسیہ طبیعت اساسیہ سنک برنجیسی وسعت ایچندہ وحدیتدر .
 انسان کندینی دفعہ بر عالم اضداد ایچندہ کورور . حال بوکے هیچ اویله
 دکل . فنلاندیا ، قریم ، قافقاس روسیہ نیک مربوطات طبیعیہ سنددرہ بو
 وحدت ، بوتجانسه رغماً طبیعت روسیہ بی باشلی ایکی بویوک منطقه یه
 تقریق ایدر . طوبراق ، تنبت ، رطوبت ، بعض شرائط مادیه و اقتصادیه
 اعتباریله بویکی منطقه آراسنده بویوک برفرق کورولورده . شمالک اکثریتله
 غیر مسکون اقسامی توندردہ تعیر اولونور چلاق و صاری به مائل کول
 رنکده واسع و بر طاقم بطاقتقلری حاوی اووه لردن عبارتدر که سننده
 یالکز ایکی آی قار و بوزدن خالیسدر . هر نه قدر او موسمه کونش
 هفته لرحه هیچ باتماز یاخود پک آز باتوب متعادیاً کوندوز ایسه ده ،
 بوز و قازلرک ارمیایه یکیدن صولرک طوماسی آراسنده پک آز مدت
 کچدیکندن ، بوراده اغاج دینلکه شایان هیچ بر نبات یتیموب ، سکود
 کبی یتن بعض اغاجلرده اوفاجق چالی حالنده قاهره ق ، یر یوصونلری
 ایچنده اکری بوکری برمنظره ابراز ایدر . اصل برنجی منطقه اورمانلر
 منطقه سیدرکه فیلانده ده 70° عرض شمالیدن باشلایوب ، حدود شمالیه سی
 روسیہ داخلنده بر قوس تشکیل ایدرک ، قطب شمالی دأره سنه قدر
 ایندکدن صوکره ، پچوره وادیسنده 30° 67° و اورال ساسله سنده
 68° عرض شمالی به قدر چبقار . بو منطقه واسعه نیک حدود جنوبیه سی
 ایسه طونه منصبدن باشلایه رق ، ژیتومیر قدر شماله و بعد شرق شمالی به
 دوزرو امتدادله ، قورسقی ، تامبوف و نیزه ایالتلردن کچرک ، وولغه
 وادیسنده کی ساراتووه و اورادن اورال ایرماغی منابعنه واصل اولور .

بو منطقه واهمه نك قسم شمالیسی باشلیجه چام اغاجلرینك انواعی حاوی
واسع ، مظلم و دهشت انگیز اورمانلره مستوردر ؛ قسم جنوبیسنده
ایسه قاین اغاجی ، میشه ، اخلامور و سائر اشجارك انواعی بولونوب ،
اورمانلر دهها لطفدر ؛ و بر خیلی میوه دار اغاجلر بولوندیگی کبی ،
ابتدا یولاف و چاودار ، دهها جنوبده آرپه و بقدا ی حاصل اولور .
اورمانلر منطقه سنك جنوبنده واقع اوتلی چول و بیانی چایلر
(سیتپ) منطقه سنه کلمجه بوده اوچ قسمه منقسمدر . قسم شمالیسی سیرك
بر طاقم اغاجلری و واسع چالیقلمری حاوی اولهرق ، آرازلنده چاودار
ویولاف تارلاری واردر ؛ قسم وسطیسی برنوع قاراطوپراقله مستوردرکه
بو طوپراق چوریمش اوتلردن متشکل اولمقله بك منبدر . بوراده غایت
بویوك بقدا ی تارلاری واردر . قسم جنوبیسی ایسه دینر و دون
ایرماقلمرینك و سائر انهارك منصلرینه قریب اولان دوز و بطاقلقی لرلری
حاوی اولوب ، دون ایرماغی منصبندن شمال شرقیه دوغرو دونهرك ،
بحر خزر ك سواحل غربیه و شمالیه سنه قدر واصل اولور . بو قسم آدم
بوی یوكسكلكنده اوتلرله مستور اولوب ، قولاغوزسر ایچنه کیرن غائب
اولور ؛ و روزكار اسدكجه حاصل اولان تموجدن آلشماش آدم دکن
طوتمش کبی اولور . بو قسمك بر چوق لرلی قیشین صو آلتنده قالب ،
یازین قامشلرله اورتولور . هله بحر خزر جهتنده کی قسم عمومیت اوزره
قوملق و سازلق اولوب ، پنه حزین بر منظره ابراز ایدر . بودائره
داخلنده اشجاردن یالکنز اریك و بیانی شفتالی ایله بر نوع کوچوك
چیتلیك اغاجی یتیشیر . صوك قسم آق دکن سواحلنه مخصوص نباتاته
مالکدر . بو ، قریب شبهه جزیره سنك ساحل جنوبیسنده واقع یایله
طاغ نك اتکلرندن عبارتدر . مذکور طاغ جنوبی شمال روزکارلرندن

محافظه ایتمکله ، اوراده بزم روم ایلی و اناتولی اشجار و نباتاتی
یتیشه بیلور .

روسیه یی ایکی قسقه تفریق ایله یین سسته پلرله اورمانلرک اوصاف
وطایفندن ، بر ضدیت تاریخیه ، بر مبارزه عصریه تولد ایتشدرد . بومتمکن
شمال ایله سیار جنوب ییتنده یعنی روسلرله تاتارلر آراسنده وقوعه کلن
محاربیدن صوکرده قازاقلر طرفندن مرکزک اک اورمانلق برقطعه سنده
موسقوه دولتک تأسیسی ایله نتیجه پذیر اولویور . بلا فاصله قطع اشجاردن
دولای اورمانلر منطقه سی آلامقله برابر الیوم اک واسعیدر . بوتون شمال
و مرکزی روسیه یی استیلا ایده رک ، غربدن شرقه ، کیهف حکومتدن
قازانه قدر اینجه لشهرک کیدیور . بوتون بومنطقه ده قیش سنه نك نصفی
املا ایدوب تنب و زراعته پک آز بر زمان براقیر . طوپراق ایکی یوز
کوندن زیاده قار آلتنده قالیر . ایرماقلرک چوزولمسی انحق مایس ویا
نیسان نهایتلرنده در . اگر شمالک شدتلی ایلك بهاری اولماسه دی زراعتک
بوتون مساعیسی بی فائده اولوردی . بو منطقه نك یکانه حیواناتی آریه ایله
چاوداردن عبارتدر . بوغدای زراعتی اندر و فیض و برکتی ایسه یوق
کییدر . بوراده طوپراق سکنه سنك غداسی تدارک ایتدیکندن اهالی
زراعتک ویرمکدن امتناع ایله دیکی حیاتی کوچوک صناعاته سایه سنده
قازانمقه مجبوردر . بوقفیر قطع اناک نفوسی انحق حس ایدیله بیله جک
درجه ده زاید ایدیور .

استقبال اعتباریله اورمانلر قطعه ده محصولدار اولوب کیتدکجه ترقی
ایدیور . بومنطقه همان بر خط مستوی افقی اراهه ایدوب یوز مترو
ارتفاعده بر تپه بیله یوقدر . مساحت سطحیه سی فرانسه دن بر قاج کره
بویوکدر . بوجرالرده نه طاغ ونه ده وادی وار . بوتون بومنطقه نك صفت

سینه‌سی آغاجسزلق در. اوربانک الک بویوک نهرلری کچن بوقطعه ده
 صوبوقدر. سما یا غمور، ارض منابع خصوصنده خسیسدر. بوفنالق
 شمالدن جنوبه، غربدن شرقه متزاید آکیدر. یا غمور انجق ایلک و صوک
 بهارلرده یا غار. یازین بر آسیا کونشیله یانان جبلاق طوپراقلر بوتون
 رطوبتی غائب ایدر. صوسزلق اودرجه ده درکه منبع و ایرماق اولمایان
 یرلرده کوییلر بهارده طویلانان بطاقلقلرده کی سیاه و پیس صولری ایچرلر.
 بوقطعه بر طرفدن سبریا، دیگر طرفدن ده آسیای مرکزی قوم چوللارینک
 تحت تأثیرنده در. جنوبی روسیه اغاچدن محروم اولقله برابرک منبتدر.
 لکن قوراقلق ایمپراطورلک ذخیره انباری اولان ایالاتده قحط و غلای اسعاره
 باعث اولویور. احتمالک اورمانسزلق ده تزاید نفوسه بویوک برمانعدر.
 روس ایمپراطورلنی مناطق مختلفه ایرقله برابر متجانسدر. روسیه نک
 وحدتی او قدر طبعیدرکه کره ارضک اوزرنده باشقه هیچ بر مملکت
 اوراسی قدر بر قومک اقامتکاهی اولغه الیریشلی دکلدر. بوتون
 فرقلری، بوتون مادی و اقتصادی ضدیتلرینه رغماً شمال ایله جنوبک
 ایکی بویوک منطقه سی برکک ایکی جزیردرکه یکدیگرینی اکال ایدر و
 بربرندن آریلاماز. برنجی رابطه طوپراق، صحرا که آرالرنده هیچ بر
 حدود طبیعییه، مانعه میدان و یرمیور. ایکنجی رابطه اقلیمدر. همان
 هر سنه قیش بوتون مملکتی عینی پوشیده سفید ایله اورتورک بربرینه
 قاریشدی ریور. کانون نائیده قیزاقله آرقانجل ویا پترسبورغدن آذرهانه
 کیدیله بیلیر. جنوبک سته پلرنده ده انهار برچوق آیلر منجمددر. آزوف
 دکری ده بحر ایض کی

— مابعدی وار —

احمد شعیب